



MEMORIA XUSTIFICATIVA DO CONVENIO ENTRE A CONSELLERÍA DE PRESIDENCIA, ADMINISTRACIÓNS PÚBLICAS E XUSTIZA DA XUNTA DE GALICIA E O COLEXIO DE AVOGADOS DE PONTEVEDRA PARA O DESENVOLVEMENTO DUN PROGRAMA EXPERIMENTAL DE MEDIACIÓN FAMILIAR INTRAXUDICIAL PARA O ANO 2017 EN PONTEVEDRA

Esta consellería de Presidencia, Administracións Públicas e Xustiza é o órgano da Administración autonómica que ten atribuído o exercicio das competencias en materia de impulso, implantación e desenvolvemento de programas e actuacións de desxudicialización de conflitos e de promoción da mediación, especialmente no ámbito de menores e familia, tal e como establece o Decreto 72/2013, do 25 de abril, polo que se establece a estrutura orgánica da Vicepresidencia e da Consellería de Presidencia, Administracións Públicas e Xustiza.

No mencionado ámbito material, constitúe un dos obxectivos a mediación familiar que é unha técnica de resolución de conflitos e máis concretamente, un proceso no que a parella acepta a intervención neutral e cualificada dunha terceira persoa (o/a mediador/a familiar) que tratará de que atopen por si mesmos un acordo duradeiro e mutuamente aceptable, considerando as necesidades de cada membro da familia e especialmente as dos nenos/as, dentro dun espírito de responsabilidade compartida e de igualdade dos proxenitores.

Antecedentes: No desenvolvemento da competencia referida anteriormente, no ano 2014 asinouse un Convenio de Colaboración entre o Consello Xeral do Poder Xudicial, a Consellería de Presidencia, Administracións públicas e Xustiza, o Ministerio Fiscal, o Colexio de Avogados de Pontevedra e a Universidade de Vigo, para a implantación dun programa experimental de mediación intraxudicial gratuíta en Pontevedra, mediante a constitución dun equipo permanente de mediación, dependente do Colexio de Avogados de Pontevedra e da Universidade de Vigo, composto por un/unha psicólogo/a e un/unha xurista habilitados e inscritos no Rexistro de Mediadores Familiares de Galicia. A implantación deste programa experimental de mediación no ámbito de familia resultou moi satisfactoria para todas as partes asinantes do convenio o que motivou que nos anos 2015 e 2016, se asinasen novos convenios de colaboración para darlle continuidade. Así, durante o ano 2017 foi tramitado un novo convenio de colaboración similar ao dos anos anteriores.

Cando a tramitación do convenio de colaboración para o ano 2017 estaba xa rematada e polo tanto o convenio listo para a súa sinatura, a Universidade de Vigo comunicou, no mes de novembro de 2017, á Dirección Xeral de Xustiza que non ía volver a participar neste tipo de actuacións e consecuentemente non ía a asinar o convenio de colaboración para o ano 2017, tal e como se viña facendo dende o ano 2014. Ante esta situación e co ánimo de axilizar a tramitación dun novo convenio que dea soporte ao servizo de mediación establecido no Partido Xudicial de Pontevedra, a Vicepresidencia e Consellería de





Presidencia, Administracións Públicas e Xustiza acordou co Colexio de Avogados de Pontevedra asinar un convenio bilateral, para dar cobertura económica ao servizo de mediación familiar intraxudicial que se viñan prestando a través dese colexio profesional dende o 1 de xaneiro de 2017. Tendo en conta que o convenio tramitado inicialmente non se firmará, e polo tanto non se establecen obrigas entre as partes baseándose nel, non producirá ningún tipo de efectos e polo tanto non haberá ningún tipo de interferencias na execución do novo convenio bilateral que se pretende asinar, ademais este novo convenio bilateral tampouco interfere no funcionamento ordinario das institucións que pretendían asinar o convenio inicial.

Na liña do anterior, o presente convenio pretende darlle continuidade durante o ano 2017 a este proxecto de mediación no ámbito de familia, pero como xa se xustificou, unicamente co Colexio de Avogados de Pontevedra, unha vez que a Universidade de Vigo manifestou a súa renuncia a este proxecto, para o cal o Colexio de Avogados de Pontevedra designará ao mediador (tanto titular como suplente), de entre os/as profesionais inscritos/as no Rexistro de Mediadores Familiares de Galicia, seleccionando a aquela persoa que pola súa formación específica e experiencia se consideren máis idónea para o desenvolvemento deste proxecto, previa aceptación desta. A tal fin, realizarase unha convocatoria de selección acorde a uns criterios que se definirán na mesma.

Finalidade: Para os efectos sinalados, tense previsto formalizar co Colexio de Avogados de Pontevedra o instrumento convencional arriba referido por un período de vixencia que comprende dende a súa sinatura ata o 31 de decembro de 2017, non obstante abranguerá as accións obxecto do convenio que se realicen desde xaneiro de 2017.

O convenio ten por obxecto establecer as condicións polas que se rexerá a colaboración entre a Consellería de Presidencia, Administracións Públicas e Xustiza e o Colexio de Avogados de para a promoción do servizo de mediación mediante o desenvolvemento dun programa experimental de mediación familiar intraxudicial gratuíta en Pontevedra, que poderá estender os seus servizos aos partidos xudiciais limítrofes en función da dispoñibilidade do mediador, dependente do Colexio de Avogados de Pontevedra, que estará inscrito no Rexistro de Mediadores Familiares de Galicia (así como do suplente para supostos de incompatibilidade e incapacidade).

O Colexio de Avogados de Pontevedra designará o mediador (tanto titular como suplente) de entre os/as profesionais inscritos/as no Rexistro de Mediadores Familiares de Galicia, seleccionando a aquela persoa que pola súa formación específica e experiencia se consideren máis idónea para o desenvolvemento deste proxecto, previa aceptación desta. A tal fin, realizarase unha convocatoria de selección acorde a uns criterios que se definirán na mesma.

O instrumento convencional que se pretende asinar fundaméntase no seguinte:





A mediación como procedemento pode dar solución extraxudicial dun xeito rápido e económico aos conflitos mediante procedementos adaptados ás partes. Deste xeito se define na Directiva 2008/52/CE do Parlamento Europeo e do Consello da Unión Europea, no seu artigo 3 como procedemento estruturado, sexa cal sexa o seu nome e denominación, no que dúas ou máis partes en conflito tentan voluntariamente acadar por si un acordo sobre a resolución do seu litixio coa axuda dunha/dun mediadora/or, procedemento que pode ser iniciado polas partes, suxerido ou ordenado por un órgano xurisdiccional ou prescrito polo Dereito dun Estado membro. Neste sentido, considérase que a mediación intraxudicial (aquela que se leva a cabo cando o proceso xudicial xa está iniciado) resultaría ser unha metodoloxía axeitada e válida para resolver unha porcentaxe significativa de procesos xudiciais, sobre todo naqueles casos nos que as dúas partes deberán continuar relacionándose no futuro por ter intereses comúns, o que se adapta á perfección aos casos dos procesos de ruptura familiar con fillas/os menores.

Financiamento:

Co fin de financiar os gastos relativos ao nomeamento do mediador por parte do Colexio de Avogados de Pontevedra, a Vicepresidencia e Consellería de Presidencia, Administracións Públicas e Xustiza, a través dos orzamentos da Dirección Xeral de Xustiza, achegará a cantidade anual máxima de 20.000,00 €, con cargo á aplicación orzamentaria 05.22.131A.481.0 do orzamento de gastos para 2017 da Vicepresidencia e Consellería de Presidencia, Administracións Públicas e Xustiza

A cantidade anterior seranlle transferida ao Colexio de Avogados de Pontevedra trala certificación da intervención ou do órgano que teña atribuídas as facultades de control da toma de razón en contabilidade e do cumprimento da finalidade para o que foi concedida a subvención, de acordo co establecido no artigo 28.5 da Lei 9/2007, do 13 de xuño, de subvencións de Galicia.

Polo exposto, considérase xustificada a utilización do instrumento do convenio para articular as actuacións de referencia, quedando o dito convenio fóra do ámbito de aplicación do texto refundido da Lei de contratos do sector público, aprobado polo Real decreto legislativo 3/2011, do 14 de novembro, con independencia de que, ao abeiro do previsto no artigo 4.2 da dita norma, lle sexan de aplicación os principios desta lei para resolver as dúbidas e lagoas que se poidan presentar.

Santiago de Compostela, 29 de novembro de 2017

O Director Xeral,

Juan José Martín Álvarez

